

تروئے شیرین برارگینی

ظہور الحق دانش

لوٹ میکی بو لُوا توریو، ہوش کاردو، چارہ دست وا پہلوان انسان اوشوئے مگم اژیلی ہتو سوم نو نیسی استانی، ناژام اوشونی۔ دیہو لوٹ دوناک رویان ہیتان بارا مختلف رائے اوشونی۔ پھتی راؤ اوتانی کی اژیلی غلط، تان تتو سوم نیسیکو نو بیتانی۔ وا پھتی راؤ اوتانی کی غلطی تتو اوشوئے، ہسے ہیتان صحیح تربیت نو اریر۔ ہسے صحیح توجہ دیتی، ہر دی چہامئے ہیتان تربیتو کاردوا بیت ہش ناژام نو بیسینی۔ خائے تھے ہیتان ناژامیو وجہ کیاغ دی کی بیرائے، ای لُو حقیقت اوشوئے کی لوٹ میکیو دیہہ بو زیاد عزت اوشوئے، تو بوہتونی اوشوئے۔ ہتو رایو وا ہتو فیصلان سف احترامو سورہ مناؤ اوتانی۔ ہتو ہے قدر عزتو کوتھولہ ہتو بریکار اچی دی دیہو روئے ہتو اژیلیان عزتو کوراؤ اوتانی۔ لوٹ میکی تان اژیلیان تے میراثہ بو کیاغ پیشھی بی اسیتائے: زمین، دولت، علم۔ مگم سفان سار لوٹ پیہ وصیت اوشوئے کی "مہ دیہو روئے بو سادہ، پسماندہ، غریب روئے۔ ہیتان تے خدمت کورور۔ بیت کندوری کی عزت متے دیتی اسونی اوا ہتو وامدار بیٹی بیمان، پسہ بیہیل کوم ہتے عزتو ہیتان تے اچی اویہتور، ایغو گانی پیہ دیہو پرشٹی الور۔"

ہے تروئے شیرین برار گینی ہے وصیتو سورہ کیچہ عمل ارینی؟؟ ای انوس ای بیٹی نیشی صلاح کوراوا لوٹھورو ژاؤ ریتائے کی "اسپہ تتو چونکہ بوہتونی اوشوئے، ہسے پہلوان اوشوئے۔ اکثر روئے ہے وجہین دیتی ہتو خوش داراؤ اوتانی، لہذا اوا تان تتو ہے چالایان انجیکو فیصلو کورومان۔" موژار موژی ژاؤ ریتائے کی "ہش کی بیرائے مہ تت تان زمینان اوچے خوروو گانی دیہو رویان تے خدمت کوراؤ اوتائے، پروچھوک دیاؤ اوتائے۔ لہذا ہیتان اوا تان ہوستہ گانیمان۔" خیرو ژاؤ گانی ریتائے کی "مہ تتو رایو وا ہتو فیصلو بو قدر اوشوئے۔ خدائے ہتوتے ہش صلاحیت دیتی اسیتائے کی ہتو ای لُوا سف روئے قربان باؤ اوتانی۔ لہذا اوا تان تتو ہے روپو انجیکو فیصلو کورومان۔" بیہ صلاحو کوری اف نیساوہ لوٹھورو تان ہے شیرین برارگینیان کپالان دوسی ایغو نسہ انگیتی ہیتان کارہ ہموش ریتائے "کیاغ دی کی کومیان کورور مگم ای لُوو یاد لاکھور۔۔۔ دیہو لوٹ موشی اسپہ ہوستہ تان بیہچیلیک۔ ہو کیہ دی قیمتہ کوستے پھار مو لاکور۔"

چھوچی بیکو یو نیستانی کی لوٹھورو ژاؤ میہی سیمئینو بوتی اسور، ہوستہ لوٹ ڈنڈا گانی شیر۔ موژار موژی ژاؤ واسکٹ انجی اسور کپالو تھروسکی اخلی، مہکام سنجیدہ نایوران۔ خیرو ژاؤ کپالی لوق پولی اسور اونوا متی کوری، کھاست لوژیکو تان سورو جادوگران غون ساؤزئے اسور۔ ای کما بس ہے روپہ بیٹی دیہی کوسی رویان تے خدمت ارینی، کوستے پروچھوک پرانی، صدقہ پرانی، کورہ فیصلان ارینی۔۔۔ مختصر

بیہ کی دیہو رویان بیتان سورہ اعتبار ہوئے۔ ہش لُو بیتان بارا کارہ توریکہ پرائے "گو کیہ سوروم آئی لوٹ میکیو اژیلیان گوڑو بی اسور، تان تتو سوم نیسیکہ پرانی۔ خدائے بیتانتے خیر کورار۔"

خائے بیہ چقہ کندوری وخت بغائے۔ ہے ترؤے شیرین برارگینی تان طریقا رویان بردیان کرینیکہ پرانی۔ ای وخت ہش ہائے کی بیتان اچتو چوکیرو رویان تان موڑی بیہ لُو سورہ جنجال اژیتائے کی "لوٹ میکیو صحیح وارث کی ژاؤ ثابت بیٹی اسور؟" سیمئینو بوتیرو ژاؤو مناک ریتانی کی "سیمئینو بوتیرو تان تتو ژاغو گانی اسور، ڈنڈا شیر، رویان بوپتونی شیر لہذا دیہوت لوٹھورو ہو کوریلیک۔" واسکٹ انجاک ژاؤو مناک ریتانی کی "واسکٹ انجاک صحیح کوروم کویان، دیہوت خدمت کویان، خورو جام ساؤزے اسور، پروچھوک دویان، روشوک کم گانی رویان پیشنان کورینران، پیسہ ہوستہ شیر۔ بیغین دیتی ہو لوٹھورو مانیلیک۔" کپالی لوق پولیرو ژاؤو مناک ریتانی کی 'لوق پولیرو ژاؤو تان تتو ژاغو صحیح گانی اسور، بو روئے تو لوان کار کونیان، بتے سورہ عمل کورونیان۔ وا بتو ہرونی خوش دارینیان کی اکثر تان خلیان دی ہتو غونہ ساؤزے اسونی---کپالی لوق پولی، اونوا متی کوری۔ لہذا اسپہ دیہو لوٹھورو ہسے، اسپہ ہتو مانیلیک۔'

بموش جنجال دیہو گوچ گوچہ عام بیکو ہے ترؤے شیرین برارگینی تان موڑی صلاح کوری ہے دیہو رویانتے ریتانی کی "تان موڑی جنجال کھیوت کومیان۔ پسہ رویان اشماراؤر، کوس مناک کی زیاد ہونی ہتے سالو بچے ہسے لوٹھورو ہوئے۔ خواہ مخواہ ضروری نو وا کی اسپہ موژار ایوالو تان لوٹھورو بیہچورا! کیہ سالی کا ہوئے کیہ سالی کا۔ آخرکار اسپہ ترؤے سف بیہ چھوتیو خمیر وا ای تتو اژیلی۔" بیغار اچی ہے ترؤے شیرین برارگینی تان تان طریقا رویان تان ڈلہ زیادئیکہ پرانی۔

سیمئینو بوتیرو ژاؤو تان مناکان ہوستہ ڈنڈا پرائے۔ دیتی ریتائے کی "رویان بوپتواؤ تان سوم جوست کورور۔ اصل اشناری طاقت، ہے سورہ رویان شاؤو تان موڑی غیرین ہوئے۔" واسکٹ انجاک پیسو اوچے پروچھوکان ترغیبو دیتی رویان تان ڈلہ لائے۔ ہتو رائے مشہور اوشوئے کی "ترغیب دیتی انسانو بو شاؤو قابو کورین ہوئے، لقمہ قبلو غیر پیر را اسونی۔" لوق پولیرو ژاؤو تان لوان جادوو سورہ رویان تان سوم چاکیتائے۔ ہتو رائے ہش اوشوئے کی "رویان باتیتان تان 'جہالتار' خوفزدہ کوری وا نو پوشیرو آسانشو لالچو دیتی دراشکہ کرینین ہوئے۔" ہتو ہمیشہ نعرہ اوشوئے کی "خوف، لالچ---خوف، لالچ۔" خاص کوری دیہو بارا بیہ کہانی رویان ہتو سوم چاکئے بوہت اریر: "مہ تت راؤ اوتائے کی 'بیہ دیہ کُھل بیٹی پھار نسہ ای نوابخ زوم شیر، ہتے زومین پھار نیسین کی ہوئے خزانار اوچے وسائلاڑ ٹیپ ای لوٹ شہر شیر۔ مہ دیہو رویان بومکی ژاغہ اصلہ بیس اوشوئے۔ مگم ہتے زومو گوچو ای گول شیر ہتے گولو مردم خور نہنگ پوری اسور، نگہ اف غیرین کی ہوئے ہتو سار بچ بیک نا ممکن، ہسے انسانو پوشورار غیر کیاغ نو ژیبوئے۔ اسپہ بیہ دیہو تنگیار دودیری بیکو بچے آنہ پھاری ہتے شہرہ بی اچی آباد بیللیک۔" مگم ہتے نہنگو خطرار بچ بیٹی بیک

بو گران۔ نہ پہلوانی دہکارہ گوئے نہ چالاکی، صرف ای منتر شیر۔ بے منتر مددو سورہ نہنگو سار بچ بیٹی پھار نیسی اسپہ تان اصل ژاغانی بیکو بوسی۔ دی ہتے منتر صرف مہ تتوت پتہ اوشوئے، ہسے بریاوا ہتو متے بش کوری بغائے۔ لہذا کا کی مہ لوٹھورو مانی مہ اچتو ہائے اوا بیہ دیہی تھے ہتوت خدمت کوم، ہتے منتر دی ہتو چیچھئے نہنگو سار بچ بیٹی ہتو گانی پھار تان بومکی شہری دی نیسیم۔" خائے وا کیاغ بیہچیتائے کیہ! دیہو روئے سادہ اوشونی، جذباتی بیٹی تو اچتو چوکیتانی۔ ہتو غون تان خلیان ساؤژتانی، اوٹو متی ارینی۔۔۔ کوریکو ہسے را استائے کی ہتے منتر یادئے نہنگو سار بچ بیٹی تان بومکی شہری نیسیکو شرط ہیس کہ پسہ مہ صورتہ بور۔

بیہ قسمہ کوری کیہ سال ای برار دیہو لوٹھورو ہوئے وا کیاوت ای۔ واری ترئے شیرین برارگینیانے سفانتے گیاؤ بہچیتائے۔ بیت انوسار انوس آباد باؤ ہانی مگم دیہو ہتے سادہ، غریب، پسماندہ روئے نہ طاقت پوشیتانی، نہ پیسہ نہ حالت بہتر ہوئے وا نہ نہنگو شکست دیکو منتر کا باتیتان چیچھیتانی۔ اٹا باتیت ہے ترئے شیرین برارگینیان بچے تان موژی ایتو چوکاؤ ہانی۔ ایغو دیک، دشمنی، لے ماژو کوریک، ایغوت کیہ ریک، چھوگی، بدمعاشی عام ہونی۔ سف ای بیٹی تان دیہو پروشٹی الیکو ژاغا تان تان لوٹھوروانان اچتو چوکی دئیکہ پرانی، تان موژی تقسیم ہونی، دیہو حالت جام بیکو ژاغا خیق دی شوم باؤ ہائے۔

ہتے روئے کا کی بیتانے 'تان تتو سوم نیسانی، صحیح وارث ثابت ہونی' را استانی ہانیسے شار استوناؤ چموٹ دونہ دیاؤ ہموش ریکہ مجبور ہونی "دَریغا!! کیہ ہوش ارتام!! بیت تتو وارث نو بیرانی۔ مطلبی، لالچی بیرانی۔ لوٹ موشیو بچے چھوئی بیرانی۔ تان موژی ایغوت کیہ ریک، ایغو دشمن نئیک، سادہ رویان دھوکہ دیتی لوٹھوروئیو تان سوم بہچئیکو ای چال بیرائے۔ ہائے سادائی کیہ ہوش ارتام!! دی لہ تھے، ایغو دشمن کھیو ہونیان۔۔۔ ترئے شیرین برارگینی وا۔"